

# 1 TESALONIKAFՉ

## Kukuə Tutε Ko Paulo Lεwօni Ըtə Tesalonikafօ

### *Boasiəsə Mi.*

<sup>1</sup> Mօ, Paulo, ku Silvano ku Timoteo bo lεwօni kukue komfo bօnlε mi mba ni Boanto Onanto ku Bonamute Yesu Kristo eto bale lə Tesalonika butə. Nya bօnlε ola boto kətə Boanto Onanto katօ wə lefonə ku diyuə kətə mi.

### *Boasօ Onanto Ani Bə Bίfi Mi Էsuə Bίtə Wə.*

<sup>2</sup> Boasօ Onanto ani lə mible eto disi. Nya lefe sa lə bօlε ola botoo, boale wə lekprakpa lə mi disi. <sup>3</sup> Nya boanyε Boanto Onanto bօtɛyi lə mi bofokanօ lə keyifo ka benlε buyifo eso. Boateyi wə tsya kase benlε betidi lelabi butə, nya benlε kusu bobε kekleke itə Bonamute Yesu Kristo.

<sup>4</sup> Bo bayimi, buyi boənkə Onanto aala mi tinti nya ւləkə mi fe wə bale. <sup>5</sup> Nya Ditiki Sεε nə bօbə bօtɛyi mii, menyifo ditiki fufu nə ete bօbօko mi. Bomu εyε lə Lεwօnօ Kenkε eto əsuəale nya nlε ni əsuəale buləkə kate bə nya bέfo bεnօ eyifo sitinti. Bίnyə kase bօlε bo əsuə lə mi nti, nya bօyifo nko itə lə mi lεkesə eso. <sup>6</sup> Nya lə օnukualεε, mi tsya áfo nnya binsi bo ku Bonamute eto nkpə bomə. Ite bə bεlε kanyi bunyə tsyaa, bέfo ditiki nəmfo ku disuəyuə nə Lεwօnօ Kenkε dítə mi.

<sup>7</sup> Lə nyamfo eso bafokanօfօ nkpe lə Makedonia ku Akaia eto kasօ kenkee, lε bobε kakase asa

ketsyiko mi ɔflo. <sup>8</sup> Fɛɛ inni Bonamute eto ditiki nɛmfo ete dísɛnsɛ ditsyi mi ɔflo dísu Makedonia ku Akaia kenke. Bomu mi Onanto bofokanɔ tsya ébusɛnsɛ isu kalebe saa. Nya insi ni bo nsi lɔɔtɛyi kulesa, itsyise betidi ba tã ébɔnɔ nya. <sup>9</sup> Nya mə kosate nɛ etiki budi ketsyiko lə kase béfo bo lə lefe nə búbə mi ɔflo ku kase bisinkli béyɛ bəfiə kedi butə, nya bífi mi əsuə bítə Onanto wəə hã nkpe nkpe. <sup>10</sup> Nya biińyə binsəkə wə Ubi Yesu wə ótakasə utsyiko ɔkɔmə, nya úbə usiə nkpe ku Onanto, nya wuutsyi Onanto eto kato ubə. Yesu əmfo hã loofɔ bo bofo ketsyiko kotonənə ko Onanto luutə babuayifo kenke.

## 2

### *Béfo Bo Ditiki Fe Onanto Kosate Eto Lele.*

<sup>1</sup> Mə bayimi, mi kosate yi lesa nə eso búbə mi ɔflo, nya bo mi ɔflo bubə ményifo bimba. <sup>2</sup> Nya biyi kase búnyə kanyi nya banɛ bo boka kakpo bo ənəmi kasɔ lə Filipi fe bubə boyo mi ɔflo lə Tesalonika mfó. Itə bə bələ bo lə mi mfó tsya, Bonamute ákpe bo nkeale nya bóɔtɛyi mi wə Ditiki Sɛɛ nəmə. <sup>3</sup> Nya kələ ko bónɛ mi bələɛ, mentsyi lə bo mantebutsyuə nye lə nsusu bua saa nye lə bɔwɛ kuutsyuə saa bokpe. <sup>4</sup> Bomu Ditiki Sɛɛ nəmə eto ɔnukuale bóɔtɛyi minɛ. Nya lesa nə ele bə bóɔtɛyi mi lefe saa dini nə Onanto lela nkə buyifo nɛ. Itsyise wə kosate ənyə tutɛtutɛ nkə buńyə butə bə bóɔtɛyi mi wə Ditiki Sɛɛ nəmə. Nya yentsyi lə kase betidi léla, bomu lə kase Onanto wəə nyi utudi saa eto ləkɔəsi kəmiə léla. <sup>5</sup> Biyi biə inni kawɛ eto etiki búfi bóbooko mi. Nya bóantɛyi mi Ditiki Sɛɛ nəmə lə bunyə kutəkə itsyi

lə mi əsuə. Nya Onanto kosate ebudi bo odansie  
lə ditiki nəmə əsuə. <sup>6</sup> Boantə atəsə itsyi lə mi oflō  
nye betidi bamba oflō.

Ite bə bokpe kusu fe Kristo eto batənkpe bə lə  
bəbēbē bo lələkəsə bə bufi lesa saa butəkə mi lə  
əsuə tsyaa, <sup>7</sup> bóle bo əsuə fe kase ubiambe laabe  
wə bebi ku lefonə. <sup>8</sup> Se boala mi sitinti esoo, iyifo  
bo lelabi boə mi tsya lə bənō Ditiki Sēē nəmfo.  
Nya inni Onanto eto Ditiki Sēē mate. Bomu bufi  
bo nkrə tsya bütə lə mi disi, itsyise befo koya tinti  
bitə bo. <sup>9</sup> Mō bayimi, bekloma biə lefe nə búbə  
mi oflō búbə bótēyi mi Ditiki Sēē nəmə mfóo,  
bókplatsya bóto diwi ketsye ku kakəmi búyifo  
keyifo itə bə, bəəmfi bo əsuə buyifo bitsyikə  
butəkə lə mi kutsyuə saa lə əsuə.

<sup>10</sup> Mi kosate ku Onanto ebudi bo adansie lə  
nnya əsuə lə kase bóle bo əsuə kukəno lə mi  
mba dikafo bənō nti. Búyifo lesa saa kukəno.  
Nya kuutsyuə saa mənəyə kabua saa lə bo əsuə.

<sup>11</sup> Biyi tsya biə bóle mi utsyuə saa fe kase ubianto  
laale wə bebi ola wəkekəkē. <sup>12</sup> Bókpe mi nkeale,  
bómansə mi ləkə nya búkalə mi kələ kase biusie  
nkrə sēē itə bə Boanto Onanto ebunyə disuəyuə  
lə mi əsuə. Itsyise wə kosate wə lékpadi mi nkə  
lə binyə bofo lə wə sekakedikō ku diyənde kenke.

<sup>13</sup> Nya eso ele bə bəso Onanto ani tsya ni  
bənkəə, lefe nə bótēyi mi Ditiki Sēē nəmfoo,  
bíemfi ni fe ditiki bimba. Bomu béfo ni fenkə  
Onanto eto ditiki. Ənukualē ini bə wə ditiki dini.  
Nya ikaboko bətsyikawuninsə tsya lə mi mba  
dikafo bənō eto nkrəsiəsie əsuə.

<sup>14</sup> Mō bayimi, asa nnya díbə mi lə əsuə mfóo,  
nya ke ni lesa nə díbə lə Onanto eto betidi əsuə

lə Yudafo eto kaso nɛ. Nya kanyi ka b́nyə lə mi betidi eto anii, nko kə íbə lə Yudafo eto kaso eto betidi ba léfo Yesu bánə lə Yudafo eto ani nɛ. <sup>15</sup> Yudafo bamfó álo Bonamute Yesu ku Onanto eto bənyeləkətidi tsya nya báte bo tsya ohiã. Mə eyifosa átaka ińyə lə Onanto əsuə nya b́taka ku sikpi bəńyə betidi ba tã lə əsuə. <sup>16</sup> Bákplatsya bə lə beti bo kusu bə boatəyi mba lenni Yudafo Ditiki Σε nəmə bə lə bənyə nkpə manlo. Lə nyaso mə asa buayifoyifo əbə ifui ékpria efe isu eyo kaka mómɔ, ísu ínə Onanto eto kotonəne eboko mə lə əsuə.

*Befo Koya Bitə Bo Tinti.*

<sup>17</sup> Mə bayimi, yofo eyi asiani se búdu lə miə ɔflo. Tsya bekpe bo lə nsusu kəmiə. Nya bokplatsya lə kusu saa əsuə bofo, lə bubə botsya ku mi ənəmi ku ənəmi tsya yəntə kusu. <sup>18</sup> Bóla boə lə busi bubə bunyə mi. Nya mɔ, Paulo, kosatee, nyɛ esu saa nya mofo bə lə mfo bubə. Fɛɛ obuale əmə məntə kusu. <sup>19</sup> Nla tinti miə lə mbə nyə mi, itsyise bufi bo ənə butəkə lə mi. Nya mi ni bo disuəyuə, itsyise mi ku bafokanɔfo bamba ni bo kutəkə ko eso bofo ləkəesi bɔsɔ lə lefe nə Bonamute Yesu luubə bio. <sup>20</sup> Sitintii, mi ni bo ləmɔ ku bo disuəyuə nɛ.

### 3

<sup>1</sup> Nya se ɛnlɛ bo bulə se boensinyə mi to eso, bóse nya uyi boə bo inuə lə b́tsyime lə Atene. <sup>2</sup> Nya b́tsyese Timoteo lə ubə okpe mi nkɛ alɛ, nya lə ɔwunsə ko mi lə mi bofokanɔ əsuə. Uyifo bo ɔyimisami wə laawunsəko bo lə kanantoyifo ku Kristo eto Ditiki Σε eto b́təyi əsuə. <sup>3</sup> Bo

nsusu ni bənkə boanla bə bulə ku kanyi ka bənle bunyə lə elo mi kuutsyuə saa ani. Mi kosate fe biyi koko biə bulə ku kanyibunyə ni nnya leetu nwə ke ntəkəko Kristo. <sup>4</sup> Biokloma biə lefe nə bəke mi lə օflօ, bütə mi bote katənsə boənkə bulə kpə ebutu mi. Nya fe kase binyii, ibə itə nko sitinti. <sup>5</sup> Nyamfo eso mintsyese Timoteo minkə ubə obe lə bisi bińyə kekləkə lə mi bofokanօ əsuə. Itsyise mmuə utu nnօ. Nya mօ sikpitete ni bənkə ətsyuə oboale əmə ébubə óbiasə mi nsusu itə bə bo bokplatsya kenke əbə íyifo bimba.

*Mi Bofokanօ Էտə Bo Disuənyuə.*

<sup>6</sup> Nya se Timoteo dísinkli ubəə, օtəyi bo ku disuənyuə nkə bisi bińyə kekleke lə mi bofokanօ ku mi lelabi itə mi bətsyuə insi enso. Ծtəyi bo tsya nkə biakloma bo tinti nya bənle kusu bobə biə biənyə bo fe kase bo tsya nle bola boə boənyə mi. <sup>7</sup> Lə nyamfo esoo, mօ bayimi, ite bə bօle kanyi bunyə nya asa nyamfo lekle bo tsyaa, mi bofokanօ aakpe bo disuənyuə kəyuəsə bo ketu. <sup>8</sup> Se bօնօ kase bińyə kekleke lə Bonamute eto bofokanօ esuəə, mfe fə nkpə fօfօ dídufə bo lə əsuə nէ.

<sup>9</sup> Boəmbօfo Onanto ani bօսօ yoօyo disuənyuə nə bօնle bunyə lə wə ənəmi lə mi disi eso. <sup>10</sup> Bօle Boanto Onanto lekpakpa bօle ketsye ku kakօmi boə utə lə busi bօtsya lə bokpe mi nkəale lə mi bofokanօ əsuə.

<sup>11</sup> Nyaso mօmօօ, Boanto Onanto kosate ku Bonamute Yesu lə basini bo kusu bə lə bofo mi օflօ bubə. <sup>12</sup> Nya Bonamute lə utə kusu bə mi lelabi itə mi bətsyuə ku betidi bamba lə difui lekpe fe kase boala mi ke. Nya lə bela

betidi bamba tsya fe kase boala mi. <sup>13</sup> Nyamfo luutə Boanto Onanto lookpe mi əsuəale, uləkə mi utsyiko lə Obonsam eto esu kenke əsuə nya lə uyifo mi kənke lə wə ənəmi isu ese diyi nə Bonamute Yesu luusinkli ubə kawunsiə kamfo ku wə mba kenke diyifo kənke.

## 4

### *Siə Nkprə Bo Ləkkə Onanto ՉԿՅԷ.*

<sup>1</sup> Mə bayimi, mə ditiki fəfə nə minla miə malə mi lekprakpa lə ntəyi ni bə, bisiə nkprə bo ləkkə Boanto Onanto ՉԿՅԷ fe kase bóte mi. Bəlenko nko kekkeke, tsya bələ mi nkəale bokpe lə Bonamute Yesu eto diyə əsuə bə lə bisi biyifo beso nko. <sup>2</sup> Itsyise biyi asa nnya bote mi ɛyɛ lə Bonamute Yesu eto əsuəale əsuə. <sup>3</sup> Onanto aala nkə biyifo mi əsuə kənke lə biləkə mi əsuə bitsyiko lə asənədidi kenke əsuə. <sup>4</sup> Ele bə usə ku usiə te kase boələ mə əsuə bəsiə nkprə bo diyifo kənke ku lə dibu əsuə. <sup>5</sup> Nya biəntəkəko əsuə eto sinə eto kamini bisiə nkprə fe betidi ba laante Onanto sikpi. <sup>6</sup> Lə nyamfo esoo, kuutsyuə saa mansəsə ənəmi lə wə ɔyimitsyuə eto usiə əsuə bə lə usu ota wə ubu. Bətəyi mi nko bunyə nya bələ mi ato bukə kekkeke boənkəə, Bonamute ebunə mba ləyifo asa nyamfo eto kakle koto kekkeke. <sup>7</sup> Onanto ákpadi bo nkə buyifo betidi kənke. Nyaso bitə lə buləkə bo əsuə butsyiko lə asinsa əsuə. <sup>8</sup> Nyaso lə mi nti eto utsyuə ani buyifo lə etsyuesa nyamfo əsuəə, inni betidi əsuə ótaka únyə. Bomu Onanto, nwə leefi wə Ləwəno Kənke kətə mi, eto əsuə ótaka únyə.

<sup>9</sup> Nya læ lelabi itə mi bayimitsyuə bafokanofɔɔ, yensife bæ bɔwɔni kulesa butə mi læ nnya əsuə. Itsyi Onanto ébote mi kase ele bæ bela mi bətsyuə koko. <sup>10</sup> Nya læ ɔnukuale əsuə, sitinti ini bæ biala mi bayimitsyuə ba kenke díkafo banɔ ba nkpe læ Makedonia eto kasɔ kenke. Nya bunsɔ bɔnlɛ mi bɔtɛyi lekpaɔpaleɛ əsuə boənkə biyifo beso nko. <sup>11</sup> Bisɔ nkpə læ əsuə kasɔ bobokosə əsuə, nya utsyuə saa eto ənəmi læ itəkə læ wə keyifo əsuə, nya bifi mi ani biyifo keyifo bɛbɛbɛ lesa nə biudi fe kase bɔtɛyi mi bofe. <sup>12</sup> Nyamfo luutə bæ mba dímamfo banɔɔ, ebubu mi nya biemukpese læ kuutsyuə saa əsuə itə lesa nə lohiā mi.

*Biensikewi Fe Bitidi Ba Ləmbə Kusubebe.*

<sup>13</sup> Mə bayimi, bola boə betɛ ɔnukuale itsyi læ betidi ba díkekpe əsuə, itə bæ læ bɛyɛ nku buwi nku ku kaminsə fe betidi ba ləmbə sɛtɔ saa. <sup>14</sup> Bofɔ bɔnɔ boə Yesu əkpə nya usi ótaka utsyi ɔkɔmə úbə nkpə. Nya Onanto luutə Yesu kpa mba əmə oboko ku wə læ wə bubə bio əsuə. <sup>15</sup> Lesa nə Bonamute letɛyi, ni əsuə buunɔyə bɔɔnlɛ mi bɔtɛyi boə, bo mba nsi nkpə læ Bonamute eto businkli kəbə lefee, boəmbɔtɔ mba díkekpe kato busu. <sup>16</sup> Lə lefe nəmfɔ o-o, bɔɔnɔ Bonamute eto bubə eto kulu ku ɔkɔ eto boto. Bɔɔnɔ Onanto eto ɔtɔnkpe ninə kenke eto ɔkɔ. Nya buufə Onanto eto kakpatsyaku. Nya Bonamute kosate lɔɔyifə utsyi kato ubə. Nya betidi ba lefo Kristo baanɔ fɛ bəkpə, mə loka botaka kəbə nkpə. <sup>17</sup> Nyamfo eto kamaa, Onanto ebokpa bomba dibu nsi nkpə nya wookpa bo usu ɔkɔ ku betidi ba letaka busu bɔtsyako Bonamute

kato. Nya buusiə ku Bonamute isu manlo manlo.  
 18 Nyaso bifi etiki nyamfo bemansə bətsyuə ləko.

## 5

### *Bisiə Bikabe Kusu Itə Bonamute Eto Bubə.*

<sup>1</sup> Mə bayimi, yamfe bə nsi nwəni mi kulesa itsyi lə lefe nye eyi nnya asa nyamfo luubə.

<sup>2</sup> Itsyise mi kosate yi sitinti biə Bonamute eto diyi nə wuubə ebuyifo fe kase uyu laabɔ lə wə kabiakɔ ku ketsye, <sup>3</sup> kəbə keyu utidi. Nya lə lefe nə utidi saa nle boteyi nkə lesa saa tə buɛ ku diyuə, lefe nəmfo ni lefe nə lesabua nə banle kusu bobee nya diəbə kasɔ lə nti nɛ. Diubə fe kase kalelefo ləənə ofonle. Kalebe saa butsyetsyi kesu əmbə.

<sup>4</sup> Fɛɛ, mə bayimi, mimii binsibə lə ketuntu əsuə. Nyaso yanle bə diyi nəmə bə lefua mi fe kase uyu leeyifo. <sup>5</sup> Itsyise mimble kenke kpe lə diyənde əsuə. Nya buunte fe betidi ba lefi mə əsuə kakpe lə abua əsuə keyifo asa kakula.

<sup>6</sup> Nyaso biensitə lə selabe lə sifi mi biləkə ato fe mba leennyi Bonamute. Bomu bitə lə buńyə kekleke lə bɔle bo əsuə kukɔɔ. <sup>7</sup> Itsyise mba laalabe selabee, ketsye baalabe se. Nya mba ba nle ntə bukpə tsyaa, kətsyə nya beekpə mu nɛ. <sup>8</sup> Fɛ bo mba nkpe lə diyənde əsuə, bitə lə butəkə ənə kukɔɔ. Le bufi bo bofokanɔ ku bo lelabi bukase əsuə fe kase ləkɔəsibi eto situ eto awu laawunsə ko bamamanyə. Nya lə bufi bo ənəmi butəkə lə Boanto Onanto eto bofokətə əsuə fe kase omamanyə eto disi eto lema ankpakpa laafo wə lə nkpe. <sup>9</sup> Itsyise Onanto mənəkə bo itə wə lefonyi nɛ nle bubə. Bomu bə



lɛ bɔyɛ lɛ Bonamute Yesu Kristo ɛsuɛ lɛ bunyɛ nkrɛ manlo. <sup>10</sup> Yesu ɛmfɔ ɛkrɛ lɛ bo disi bɛ lɛ busi nkrɛ o-o, bukrɛ o-o, buusiɛ ku wɛ lɛ wɛ dibɛ bio ɛsuɛ. <sup>11</sup> Lɛ nyamfo esoo, bikakpe nkɛale lɛ bikawunsɛko bɛtsyuɛ fe kase bɛnlɛ buyifo mɔmɔ.

*Bɛlɛ Ɔsuɛ Ola Lɛ Bilɛkɛ Asa Bua Saa Lɛ Ɔsuɛ.*

<sup>12</sup> Bo bayimi, bɔlɛ mi lekpaɛ bɛ bifi dibu krɛ bitɛ mi batɔnkɔtɔnko ba laakplatsya kate mi Kristo eto nkrɛ busiɛ eto esu. <sup>13</sup> Bela mɛ lɛ bibu mɛ kukɔnɔ lɛ kusu sɛɛ ko ɛsuɛ banlɛ mi bokpa akanyɛnko eso. Lɛ mible lɛ bisiɛ lɛ diyuɛ ɛsuɛ.

<sup>14</sup> Nnya kamaa, bo bayimi, bola tinti boɛ bɛlɛ kɔlɛ mba lanlɛ otsyekle bokpe. Bekpe mba laate sikpi nkɛale. Bɛwunsɛ ko mba lehiɛ bɔwunsɛ ko. Nya lɛ bifi dibusɛ bitɛ utsyuɛ saa. <sup>15</sup> Bɛlɔ bebe kukɔnɔ biɛ kuutsyuɛ saa mɛmfi kabua ofo kabua kayo. Bomu lefe saa, bikeyifo kasɛɛ bikɛtɛ mi bɛtsyuɛ ku betidi ba kenke.

<sup>16</sup> Bitɛ lɛ diyuɛ lɛ lekɛ mi lɛ ɛsuɛ lefe saa. <sup>17</sup> Biɛntɛ lɛ ani lɛ elo mi lɛ olatoto ɛsuɛ. <sup>18</sup> Nya bifi leninsɔ bitɛ Boanto Onanto lɛ lesa saa ɛsuɛ. Itsyise nyamfo ni lesa nɛ Onanto nɛlɛ bɔtɔ ketsyiko lɛ mimba kenke ntɛkɛko Yesu Kristo nɛ.

<sup>19</sup> Bienti Lɛwɔnɔ Kenkɛ kusu lɛ mi nti. <sup>20</sup> Biemfi lesa nɛ laabɔ ketsyi lɛ Onanto eto bɛnyɛlɛkɛtidi eto kɛnyɛ fe lesa bimba. <sup>21</sup> Bomu bekplatsya lɛ bebeɛ ɔnɔkuale wɛ nkpe lesa saa nɛ biɔnɔ lɛ bifi kasɛɛ ka nkpe lɛ nnya kekɛle. <sup>22</sup> Bilɛkɛ mi ɛsuɛ bitsyiko lɛ lebua saa ɛsuɛ.

<sup>23</sup> Nya bɔlɛ Onanto wɛ lɛtɛ bo diyuɛ saa bɔtɔ bɛ lɛ uyifo bo kenkɛ lɛ kusu saa ɛsuɛ. Nya lɛ ose mi lɛwɔnɔ ku nsusu ku mi ɛsuɛ eto sinɛ

kenke bə bemunyə kabua saa lə mi əsuə lə lefe nə Bonamute Yesu Kristo nsi luubə. <sup>24</sup> Nya Onanto wə lékpadi mi nkə befiani wə balee ebɔwunsəko mi isu ese lə kalosəkɔ. Itsyise lesa nə ke ɔ́tɛyi nkə wuuyifoo, weeyifo ni.

<sup>25</sup> Mɔ bayimi, bikato ola kətə Onanto lə bo disi.

<sup>26</sup> Biləkə kafo faa bɛbuta lə bisisə bafokanɔfɔ.

<sup>27</sup> Nlɛ mi bɔtɛyi sitinti fe nwə ńyə lə Bonamute Yesu Kristo eto kɛnyɛ minkə bekla kukue komfo bete bafokanɔfɔ kenke.

<sup>28</sup> Bonamute Yesu Kristo eto lefonə lə disia ko mi.

**Onanto eto kakle fɔfɔ; Sɛkpɛle  
Sekpele: Onanto eto kakle fɔfɔ; Sɛkpɛle New  
Testament**

copyright © 2008 Wycliffe Bible Translators, Inc.

Language: (Sekpele)

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Feb 2024 from source  
files dated 29 Jan 2022

5fc03d2a-3cf8-5607-a6e0-9e1e197140bd